

12/06/1999

Skuasy Terbuka KL: Laluan tiga pemain negara sukar

Zairee Zahir

LALUAN tiga pemain handalan negara dalam acara lelaki dan wanita Kejohanan Skuasy Terbuka TA Kuala Lumpur agak rumit untuk melangkah jauh pada 29 Jun-4 Julai ini.

Berdasarkan undian, pemain terbaik negara, Ong Beng Hee, terpaksa berdepan pemain Mesir yang menduduki tangga ke-58 dunia, Mohd Medhat Morsi, dalam pusingan pertama.

Andainya melepasi cabaran Mohd Mehdat, tugas lebih berat menanti apabila pilihan pertama kejohanan, Billy Hardrell, yang juga pemain tangga ke-35 dunia, menunggu dalam suku akhir.

Bekas pemain utama negara, Kenneth Low, yang kini menduduki tangga ke-81, juga berdepan tugas berat menghadapi pemain Pakistan yang diletakkan sebagai pilihan keempat, Kashif Shuja.

Namun, Kenneth yang sering melonjak dengan persembahan baik ketika beraksi dalam kejohanan tempatan, mampu membuat kejutan dan jika berjaya, tugas ke separuh akhir lebih terbuka apabila seorang lagi pemain Pakistan, Ajaz Azmat, dijangka menanti dalam suku akhir.

Bagi acara wanita, harapan tetap disandarkan kepada juara Asia, Nicol Ann David, walaupun pemain itu terpaksa mengharungi dua perlawanan peringkat kelayakan.

Bagaimanapun, langkah pemain berusia 16 tahun itu mungkin tersekat dengan adanya pemain bertaraf dunia seperti Carol Owens dari Australia yang kini menduduki tangga ke-10 dunia dan Vanessa Atkinson dari Belanda (17).

Bagi pemain negara yang lain seperti Mohd Azlan Iskandar, Marcus Yeap, Leong Siu Lynn, Sharon Wee dan Sandra Wu, pertandingan julung kali yang menawarkan hadiah wang tunai keseluruhan hampir RM32,000 itu hanyalah sebagai persiapan ke Kejohanan Remaja Dunia di Belgium dan Sukan Sea XX Brunei, Ogos ini.

Bagaimanapun, persembahan baik pasti menyuntik semangat untuk beraksi lebih baik dalam Terbuka YTL di gelanggang yang sama, 6-11 Julai ini.

Setiausaha Kehormat Persatuan Raket Skuasy Malaysia (SRAM), Lt Kol (B) Wong Ah Jit, bagaimanapun berkata aksi bermutu tinggi setiap kali beraksi di depan penyokong sendiri menjadi faktor bagi pemain negara melangkah ke peringkat lebih jauh dalam kejohanan yang disertai pemain handalan dunia.

"Sebelum inipun, pemain kita sering menunjukkan persembahan baik apabila mereka bermain di gelanggang sendiri dan tidak menghairankan, beberapa kejutan daripada pemain kita pasti menyusul," katanya sejurus majlis penyerahan cek daripada penaja di Wisma MOM, semalam.

Presiden Persatuan Skuasy Asia (ASF), Mokhzani Mahathir, menyaksikan penyerahan cek bernilai RM60,000 oleh Pengerusi TA Enterprise Bhd, Datuk Tony Tiah, kepada Pengerusi Persatuan Raket Skuasy Kuala Lumpur, Abdullah Sani Karim.

(END)